



MANUAL Planem Koral long Rif

BLONG ADAPT LONG CLIMATE CHANGE



giz



From Wanem Yumi Wantem

Planem Bak Korel Long Ol Rif Blong Yumi?

Rif hemi impoten tumas long laef blong yumi. Hemi haos blong ol fis mo ol shell we yumi stap kakai, mo salem blong mekem mani long hem. **Sapos rif i nomo gat, bae yumi faenem ol fis mo shell wea bakegen?**

Process ia blong **planem bak korel** long ol rif blong yumi hemi wan wei blong helpem ol rif i groem bak ol korel we oli bin ded o brokbrok taem ol **pipol oli wokbaot andap** long olgeta o long taem blong wan **strong mo raf solwota** o taem we I kat **korel blijing** mo **osen acidifikesen** olsem we **CLIMATE CHANGE** i mekem.

Yu save helpem rif blong yu sapos yu planem bak ol pis korel long wan sef ples long rif blong yu. Bed blong korel bae i mas stap long wan ples we bambae ol pipol oli no save spolem mo distebem wok blong yu.

Teknik ia i save helpem rif mo laef blong komiuniti bigwan from se: **1) yu groem korel long rif bakegen; 2) korel i save gro long ples we i nomo bin gat bifo** blong mekem rif; **3) Rif i pulum fis i kam** bakegen blong vilej, mo komiuniti i save huk blong **kakai mo winim smol vatu; 4) helpem rif blong protektem vilej daon long solwota long taem blong bigfala wave o** tsunami blong brekem wave.



Ol niufala korel we oli gro long rif mo yu save karem samfala kaen olsem we oli brok blong planem long bed blong korel we yu mekem.



Sam long ol materials we yu nidim blong mekem wan bed blong korel.

CLIMATE CHANGE I STAP KILIM OL RIF LONG VANUATU. YU MAS TEKEM ASKEN BLONG HEMPEM RIF I KRO BAK KWIK

Wanem Materials Bae Yu Nidim?

1. Tik Rop (blong fasem bricks i go long mesh wire)
2. Mesh Wire **75x50** (blong fasem korel long hem)
3. Galvanised tie wire (blong fasem taet ol steel rod mo mesh wire)
4. Steel rod (size 12 mo 6m long) Karem 2 sapos yu wandem mekem 2 bed blong korel
5. Hacksaw (blong katem steel rod i go long haf from oli kam long 6m long) Hardware
4. Cutters (blong katem mo fixim ol tie wire we yu usum blong fasem tugeta ol steel rod)
5. Plastik kebol ties (blong fasem ol korel i go long mesh wire)
6. Briks (size 20 mo 2 briks blong usum long wan bed blong korel)
7. Kontena o dis (blong fulmap korel we yu tekem blong planem)

Wanem Nao Process Blong Mekem 1 Bed Blong Korel?

Hao blong bildim bed blong korel?

1. Yu mas mekem sua se yu gat evri materioli yu nidim blong mekem wan bed blong korel (Luk list blong ol materioli long pej 2). Hemi mas wan gufala dei mo weather i mas klia gud blo yu save daeva long rif.

2. Yu tekem wan 6m size steel rod mo yusum hacksaw blong katem long haf blong save gat 2 pis blong 3m size.

3. Yu stanemap 2 briks kolosap long 1m apat, tekem meshwire mo putum andap. Afta yu benem 3m steel rod mo pusum insaed long las hol blong mesh wire long fofala kona (luk fes mo seken pikja). Haet blong mesh wire i mas kasem knee blong yu. Usum tire wire blo fasem strong steel rod i go long mesh wire mo yusum cutter blo katem tire wire mo blo benem wire blong taetem strong.

Blong mekem anchor blong korel bed?

4. Yu katem tik rop long wan size blo 2m long, mo yu mas gat 2 pis, blong fasem brik i go long mesh wire (luk namba 3 pikja). Fasem brik wetem rop blong i holem strong bed blong korel taem solwota i muvmuv.

Hao blong go kolektem ol korel blo planem?

5. Taem bed blong korel i redi, yu mas go daeva long rif blong kolektem ol laef, yangfala pis korel. Mekem sua yu faenem gud korel wetem wan pis blong ded korel o ston we hemi gro long hem. Hemi impoten from bae yu mas no brekem niufala gro blong korel mo bae yu usum stamba pat ia blong fasem korel i go long mesh wire long bed blong korel. Yusum kontena o dis blong fulmap korel blong yu.




Hao blong fasem ol korel i go long bed ?

6. Yu karem ol plastic “cable ties” blong fasem raon long stamba blong wan korel plant i go long mesh wire (luk pikja). Holem ol niufala korel wetem kea mo mekem i sidaon gud antap long mesh wire bifo yu taetem. Mekem semak long evri korel yu putum long bed mo mas givim inaf spes betwin wanwan korel.



Hao blong tekem bed blong korel i go aotsaed long rif?

7. Afta we yu fasem ol korel i go long bed mo fasem tufala briks olsem anchor, yu tekem korel bed i go edge blong rif . Yu mas save gud eria we bae yu putum bed long hem from bambae yu mas stap go blong jekem oltaem blong mekem sua se hemi stap gud mo jek sapos korel i gru.



Samfala tingting blong planem bak korel long rif blong yumi:

Hemi impoten blong kipim mo mekem ol rif blong yumi oli sef oltaem from hemi impoten pat blong laef blong yumi ol pipol long ol aelan long Vanuatu. Taem rif blong yumi hemi helti i stap, ol fis tu bae oli gat kakai mo ples blong stap long hem, mo yumi ol man tu stap kakae we hemi save givim helti kakai long yumi.

From ol risen ia, hemi impoten tumas blong yumi everiwan i mas planem bak korel long ol rif kolosap long yumi, espeseli long olgeta ples we oli korel i ded finis mo i stat blong no gat risos blong solwota long hem from climate change.

Blong Moa Infomesen, Yu Save Kontaktem Ofis Blong SPC-GIZ Climate Change

SPC/GIZ Coping with Climate Change in the Pacific Island Region (CCCPIR)

PO Box 306, Port Vila, Vanuatu
phone: +678 555 2187 / 29594
E-Mail: Christopher.Bartlett@giz.de



giz

